

Jesus in der Wüste

Noch nass vum Jordan - frisch gedaaft
de Jesus in die Wüste laaft.

Er soll, nach seines Vaters Wille,
40 Daa sei Hunger stille
mit meditiere un Gebet.
Heit nennt mer sowas Null-Diät.

Nur Sand un Stää sinn um ne rum,
kä Mensch is zum Verzehle kum,
kä Bierche un kä Gläsje Wei,
do geht die Zeit jo net verbei!

Do zieh'n sich 40 Daa wie Kau-
gummi und das hat ganz genau
de Deiwel spitzkriecht un sich dann
gemach an denne arme Mann.

„Gell, du bisch doch Gottes Sohn“,
sat der Bankert voller Hohn,
„do wär das doch fer dich net schwer
mol grad e bissje neweher
zu zaubere – ich hätt do grad
e schöner runder Stää parat.
Du kännsch jetzt grad mol denne Wacke
zum e Läbche Mischbrot backe.“

„Ich kännt schunn, wann ich wolle deht,
doch irgendwo geschriebe steht,
der Mensch lebt net um Brot allä,
drum mach kä Brot ich aus dem Stää!“

„Allohopp, dann ewe net“,
saat de Deiwel, „doch ich hätt
noch was ann'res fer dich do:
Guck der mol die Gegend oo!
Alles bis zum Horizont
und driwwernaus das ganze Lond,
das schenkt ich der, du derfsch's behalle,
musch nur jetzt in de Sand do falle
un mich anbete un ganz schnell
deu Chef vergesse, uff de Stell.“

„Aach des, du Schuft, des werd net klappe,
ich bet do nuff – nur zu meim Babbe!“

„Zum Dunnerkeil, verflucht, verreck!
Doch ich hann noch was im Gepäck!
Stell dich uff denne Felse dort!
Dann springsche ab und fliehsch grad fort,
weil dich e Engel ganz bestimmt
schnappt un an de Hand dich nimmt
und mit dir, irgendwo ganz sacht,
e superweiche Landung macht!“

„Nä, nä, uff dich du ich net heere!
Ach, du dich grad zum Deiwel schere!
Ach so, das geht net, bisch schunn dort!
Dann hau halt ab! – Los, mach dich fort!“

So is der Deiwel, zornentbrannt
heimwärts in sei Höll gerannt!
Un Jesus der hat weiterg'bet.
So hat's geklappt mit der Diät!

Superschlank und braun gebrannt,
kaum jemand hat ne noch gekannt,
motiviert, voll Tatendrang
is er in die Welt naus gang.
's hat viel zu du gäb in sei'm Land,
doch das is allseits jo bekannt.

Drum heer ich uff mit mei'm Bericht,
doch uff e Lied werd net verzicht.

Ehr kännte jo, das wär doch schää,
mich unnerstütze beim Refrää.
Den schmeißt de Parrer jetzt galant
mit ner Folie an die Wand.

Aach bei de Stroph wär's net vekehrt,
wann mer mich unnerstütze dehrt.
Damm, damm, ganz äfach un dezent,
so wie mer's halt vun friehr noch kännt!

Das Lied dazu:

Nä, ich mach aus Stää kä Brot

(Marmor, Stein und Eisen bricht)

Guck der mol denne Stää do an! Damm damm damm damm
Ä Läbche Brot mer draus mache kann. Damm damm

Nä, ich mach aus Stää kä Brot,
is a noch so groß die Not.
40 Daa die geh'n vorbei,
ich bleib mei'm Babbe treu.

E Beleschdes mache kännsch der aa! Damm damm
Mit Lewwerworscht oder Schwadema! Damm damm

Nä, ich mach aus Stää kä Brot, ...

Ja, wer net will, der hat gehabt! Damm damm
Dann werr doch vun dem Sand do satt! Damm damm

Nä, ich mach aus Stää kä Brot, ...

Und zum Schluss hab ich zum „Heile Gänsje“ gedichtet:

Do vorne is e Kerbche

Es Lewe kann sehr deier sei,
so is das in der Welt,
e jeder will was vun dir hann,
all wollen se dei Geld.

Drum hall's zusamme, bass druff uff,
gäb's unnötig net aus.
Doch heit derf's mol e Ausnahm sei,
rick nor mol ebbes raus.

Weil vorne, wo eraus mer geht,
änner mit em Kerbche steht!

Refrain:

Do vorne is e Kerbche, geh net dro vorbei!
Do steht änger mem Kerbche, schmeiß em ebbes nei!
Geiz ist geil, vergess den Scheiß
un ebbes in das Kerbche schmeiß!